



*Sermon de la montagne, ou Iesus-Christ fait au peuple declaration des Bien-heureux.*

**L**ESVS pour eiter la foule du peuple qui le suiuoit, monta en vne montagne: & y estant assis, ses Disciples s'approcherent de luy, & les endoctrinoit, disant :

Bien-heureux sont les pauvres d'esprit, car le Royaume des Cieux est à eux.

Bien-heureux les debonnaires, car ils possederont la terre.

Bien-heureux sont ceux qui pleurent, car ils seront consolez.

Bien-heureux sont ceux qui ont faim & soif de iustice, car ils seront rassasiez.

Bien-heureux les misericordieux, car misericorde leur sera faite.

Bien-heureux sont les nets de cœur, car ils verront Dieu.

Bien-heureux sont les pacifiques, car ils seront appelez enfans de Dieu.

Bien-heureux ceux qui sont persecutez pour la iustice, car le Royaume de Dieu est à eux.

Donc vous serez bien-heureux quand on vous aura dit iniure & persecution, & toute mauuaise parole contre vous en mentant à cause de moy. Esioüissez-vous alors, car vostre loyer est grand aux Cieux: Ainsi ont-ils persecuté les Prophetes qui ont esté deuant vous. A l'opposite Iesus prononce malediction sur les riches, qui mettent leur esperance aux richesses de ce monde. Sur ceux qui sont saoulez, qui rient à present, & qui vivent avec toute mondanité.

*S. Matthieu Chap. 5. S. Luc Chap. 6.*